

N'edema de abbondanza inteletuala

Dant puec dis é jù a piz tla ULB l "Convegn internazional di insegnanc de todesch" IDT



Festa de conclujion dl IDT tla Aula Magna dla Università Ledia de Bulsan.

La ULB à ospité chest ann la 15. edizion dl Convegn internazional de todesch - IDT, che fova vegnuda organisada sot al tema "Todesch da daite, todesch da defora". Per la ULB, ma ence per dut Südtirol él sté l prum congres internazional de chestes dimenscions. Al é sté n'edema de laour intensif per ben 2.684 insegnanc de todesch da 110 nazions y 5 continenc, te chela che al é vegnù auzé fora i aspec dl todesch sciche lingaz dla oma, sciche lingaz secundar y sciche lingaz forest. Tl congres àn podù emparé da conesce realtés nueves dl insegnament dl todesch fora per l mond. Tl'India y te perts d'Africa é i insegnanc de todesch confrontés p.ej. con la gran desfida da ti trasmete l lingaz a grups fina 150 scolés. Tla Cina y t'India vegn l todesch ensegné demé te n contest

spezifich, sciche p.ej. "Todesch per enjigniers" o "Todesch per scienzis dl'economia".

L congres tegni a Bulsan é jù a piz con na festa de conclujion t'l'aula magna dla ULB. L prof. Hans Drumbl, president dl ITD 2013 à splighé: "Bulsan é da vedlamente encà na zité dl comerz, sen éla steda per n'edema alalongia la zité dl barat inteletual." L president dla Università prof. Konrad Bergmeister à ilustré i segnai positifs vegnus fora dal Convegn y à encudé: "I enjignaron na professura convenzionada per todesch sciche lingaz dla oma, todesch sciche lingaz secundar y todesch sciche lingaz familiar."

L diretif dla Federazion Internazionala di Insegnanc de Todesch (Internationale Deutsch-

lehrerverband - IDV) ti à passé inant la bacheta a la proscima zité che ospitarà l convegn: Fribourg tla Svizera. L prof. Prof. Thomas Studer dla Università de Fribourg à dit ensci dl convegn a Bulsan: "Sce ie fosse president dl comitè olimpich, dijesse che le IDT a Bulsan é sté l miour IDT de duc i temps. Perchel dije sciche professour scempl de todesch: dilan!"

La co-presidenta prof. Antonie Hornung à rajoné de "n'edema che à porté n barat de gran valuta", y la

presidenta dla federazion di insegnanc prof. Marianne Hepp à enjonté: "Per i partezipanc é chest convegn ence na motivazion te si laour soura dut l mond.

De sciche an pò porté ite i conegnus scientifics tles truepes scoles de Südtirol, à rejoné l president dl Consorzi di Comuns de Südtirol Arno Kompatscher: "La sconanza dl todesch é steda per Südtirol die alalongia na cuestion de souravivenza. Encuei spere che i lingac desvalifs ne sibe nia plu en

concorenza. I me dejidreie che chisc dis de congres sibe per Südtirol n valour emplù y che i adoronse chest savei per porté l insegnament dl lingaz al miour level che ala va."

N rengraziament da pert di organisadours ti é vegnù fat a duc i colaboradours de chest gran event, dantfora al manager dl convegn Hannes Hell y en particular al Eurac-Convention Center con Pier Paolo Mariotti y Daniela Gasser, che à pité n'edema alalongia na maestria logistica.



Dmc prof. Annemarie Saxalber, prof. Thomas Studer, prof. Marianne Hepp, prof. Konrad Bergmeister, prof. Antonie Hornung, dr. Arno Kompatscher, prof. Hans Drumbl, dr. Martha Stocker, prof. Renate Zanin.